

（欽定）廓爾喀紀畧

卷十九

欽定廣輿記

卷八

欽定廓爾喀紀畧卷十九

二月初三日

壬寅

成德奏言竊

臣

由第哩浪古帶

領官兵前進至通拉上山該山峰嶺盤折雖有
積雪尚可由山邊小路繞道行走連日以來仰
賴

聖主洪福天色晴明

臣

與總兵穆克登阿督率官兵

攀援前進於十二月二十七日行抵距聶拉木

四十里之拍甲嶺查詢該處雖有山道可通絨
轄地方然亦俱有積雪封山賊匪當此大兵壓
境諒不能潛出阻擾但拍甲嶺地處扼要且距
聶拉木不遠應需安駐官兵庶得聲勢聯絡惟
臣所帶將備現在不敷分布查協領九鼐曾經
屢次出師尚爲諳練臣隨揀派兵丁一百名令
該協領管領駐防卽令遊擊張占魁屯備木塔

爾色木哩雍忠巴塘副土司成勒春丕勒帶領
漢屯弁兵二百餘名並代辦戴琫事務之烏珠
那旺所領唐古忒兵七十人由西北迤山而進
令都司張志林屯備阿忠思丹巴帶領漢屯弁
兵二百餘名並第巴密魯甲壩所領唐古忒兵
六十名由西南迤山而進臣於二十八日寅刻
乘夜急進至相距彼處約里許之河沿賊匪向

於夜間將橋板抽去先經哨探河身不至甚寬
兼值冬令水涸尚可跳越並經屯弁兵丁等擡
負木條至彼搭橋濟渡更有涉水而過者臣卽
督率滿漢屯土弁兵由西北進攻令總兵穆克
登阿帶兵由西南進剿惟時天已黎明西北官
兵先將山頭扎住斷其歸路西南官兵與臣所
帶官兵會合齊抵各寨脚下經遊擊張占魁等

率領奮勇各屯弁官兵鼓勇直入賊匪猝不及
防官兵用火彈拋擲寨房燒斃賊人甚多其有
跳出竄逸之賊卽被官兵分路殲戮殺死賊匪
二百餘名生擒七名搶獲鎗刀器械甚多並搜
得米糧十數石牛羊數十隻惟官寨之賊恃其
寨房高大固守不出放鎗抗拒經奮勇官兵直
撲官寨賊匪用鎗石擊打我兵間有帶傷陣亡

者臣隨令四面拏卡圍困用礮攻擊諒賊匪釜

底遊魂立就殲除斷不能一名漏網臣復查詢

賊匪接續路徑離聶拉木二三十里有木薩橋

地方道路險窄兩山夾峙爲賊匪出入要路應

駐官兵拏卡防守臣隨揀派屯備木塔爾帶兵

一百五十名帶同熟悉路徑之烏珠那旺第巴

密魯甲壩率兵一百五十名在彼拏卡駐守以

防賊匪潛出接應並杜其逃竄之路該屯備木
塔爾素爲諂練得力可無他虞

同日鄂輝奏言臣於脅噶爾途次接准成德咨

送摺稿內稱帶兵至聶拉木與總兵穆克登阿
分路進攻殺死賊匪二百餘名生擒七名等語

臣思賊匪以無能小醜尚敢據守邊境一經官
兵進剿自同摧枯拉朽臣所慮者賊匪佔據之

聶拉木等處俱離巢穴不遠倘聞大兵將到畏懼潛逃辦理轉滋遲滯今幸

天奪其魄坐待殲誅而官寨尚有頭人固守不出業經四面圍困自不難一一殲擒惟成德所帶之兵究屬無多且分路掣卡亟須兵力接濟查總兵張芝元與

乾清門侍衛承德等帶領屯練五百名已於正月

初一日自脅噶爾前進計日內可到聶拉木隨
同成德打仗臣現卽星夜趲行以期速抵聶拉
木與成德會同勦辦至第哩浪古爲我兵後路
而濟隴絨轄兩處又有賊匪佔據恐其聞信潛
來冀圖救應或由第哩浪古繞至亦不可不防
雖經成德留有漢番兵丁究覺不敷尚須添兵
駐守臣過後藏時帶有達木防兵一百餘名卽

留該處堵禦更足以資得力再聶拉木收復之
後旣須留兵防守而濟隴絨轄現有之賊又當
前往剿除查副將五十一遊擊劉懷仁所帶後
兩起屯兵年底俱可到藏臣現復飛札嚴催令
其兼程前進庶兵力充足方可分路進攻均奏
入

上命軍機大臣傳諭福康安鄂輝成德曰賊匪在聶

拉木一帶逗遛觀望成德於到彼後卽與穆克登
阿率領弁兵乘夜分路進剿鼓勇直入將賊匪殺
死二百餘名捉拏活口奪獲器械米糧等項使軍
聲先震賊匪膽落並四面拿卡用礮攻擊圍困官
寨賊匪使其無從逃竄所辦尚好成德著賞給大
荷包一對小荷包四個穆克登阿著賞給大荷包
一對小荷包二個張占魁著記名以叅將用屯備

木塔爾經成德派令帶兵前進並於木薩橋地方
拏卡防守木塔爾素爲奮勇曾著勞績甚屬可嘉
著與此次成德派出帶兵之屯備色木哩雍忠巴
塘副土司成勒春丕勒於現在職分上各陞頂帶
一等並著該處各賞給大緞二疋俾其知所鼓勵
益加感奮至成德奏官寨之賊恃其寨房高大固
守不出放鎗抗拒經官兵攻撲拏卡圍困等語此

次廓爾喀侵擾後藏係瑪木薩野帶兵前來諒必
卽在官寨屯據今成德挈卡圍住無從逃竄正當
乘其窘蹙之時督率官兵奮勇攻勦生擒瑪木薩
野以成功績况鄂輝現已帶兵接應前抵該處兵
力較壯無難將官寨卽時攻破福康安到藏已及
兩旬今成德已將逗遛邊境賊匪攻圍勦殺自必
卽日將官寨攻破乘勝直前福康安卽可赴此機

會尅期進發以冀迅速集事倘續調兵丁猶木齊
集轉不妨稍爲停待竟俟海蘭察等及索倫達呼
爾兵到後再行統領深入雖進兵略遲數日而成
功更爲穩速同日又據鄂輝奏現派張芝元等帶
領屯備五百名自脅噶爾前進鄂輝亦卽馳抵聶
拉木與成德會同勦辦等語所辦亦好此時鄂輝
自己早抵聶拉木與成德會合攻勦官寨賊匪惟

計日以盼捷音之至

上諭內閣曰上年鄂輝成德帶兵前赴衛藏邊界一帶
勦捕廓爾喀賊匪途次行走濡遲未能迅速節
經降旨嚴飭並將該二員交部嚴加議處嗣經該
部議將鄂輝成德照溺職例革職具題朕以其現
俱帶兵將部本交軍機處存記以觀後效本日據
成德奏帶領將備兵丁行抵拍甲嶺督率滿漢屯